



# ՀԵՌՈՒՍԱՏԵՍՈՒԹՅԱՆ ԵՎ ՌԱԴԻՈՅԻ ՀԱՆՁՆԱԺՈՂՈՎ

## ՈՐՈՇՈՒՄ

07 հունիսի 2024 թվականի թիվ 59-Ա

ք. Երևան

### «ԲԱԳԵՏ» ՍՊ ԸՆԿԵՐՈՒԹՅԱՆ ՆԿԱՏՄԱՄԲ ՀԱՐՈՒՑՎԱԾ ՎԱՐՉԱԿԱՆ ՎԱՐՈՒՅԹԸ ԿԱՐՃԵԼՈՒ ՄԱՍԻՆ

Հեռուստատեսության և ռադիոյի հանձնաժողովը (այսուհետ՝ Հանձնաժողով), ուսումնասիրելով 2024 թվականի մայիսի 17-ին իր նախաձեռնությամբ հարուցված թիվ 29 վարչական վարույթի նյութերը, **պարզեց**.

Հանձնաժողովը «Տեսալսողական մեդիայի մասին» օրենքով (այսուհետ՝ Օրենք) վերապահված իր վերահսկողական գործառույթներն իրականացնելիս հայտնաբերել է Օրենքի պահանջի խախտում, այն է՝ ցանցային օպերատորի գործունեություն իրականացնող «ԲԱԳԵՏ» ՍՊ ընկերության (այսուհետ՝ ցանցային օպերատոր) կողմից տեսալսողական ծրագրերն առանց պայմանագրի վերահաղորդում իրականացնելու Օրենքի դրույթի պահանջի խախտման փաստ:

Հանձնաժողովը, ղեկավարվելով Օրենքի 32-րդ հոդվածի 1-ին մասի 14-րդ կետով և 42-րդ հոդվածով, համաձայն որի՝ Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով և հիմք ընդունելով Հանձնաժողովի նախագահի 2024 թվականի մայիսի 07-ի թիվ 25-Ա հրամանը, իրականացրել է ցանցային օպերատորի մոտ մշտադիտարկում տեղում դիտարկում իրականացնելու միջոցով:

Տեղում դիտարկում իրականացնելու արդյունքում 2024 թվականի մայիսի 14-ին Հանձնաժողովի ծրագրերի մոնիտորինգի և վերահսկողության վարչության կողմից կազմվել է արձանագրություն, համաձայն որի՝ ցանցային օպերատորի հեռարձակող կայանում ժամը 15:20-ից 15:50-ը Հանձնաժողովի նախագահի 2024 թվականի մայիսի 07-ի թիվ 25-Ա հրամանի շրջանակներում իրականացված մշտադիտարկման արդյունքում պարզվել է, որ ցանցային օպերատորի կողմից վերահաղորդվում են թվով 61 հետևյալ տեսալսողական ծրագրերը՝ «Երկիր Մեդիա», «Հ2», «ABN», «Ազատություն TV», «НТВ мир», «Euronews», «РБК», «Известия», «Кинопреьера», «Киномикс», «Кинокомедия», «Киносведения», «Киносемья», «Киноыжас», «Мужское кино», «Наше новое кино», «Индийское кино», «Կինոման», «Дом кино», «НТВ стиль», «ԼայքՀար», «Բազմոց TV», «Eurosport 1», «Бокс ТВ», «HDL», «ММА-TV», «KHL», «Ֆիթնես», «National Geographic», «Discovery channel», «НТВ право», «365», «Nick toons», «Nickyr», «Nickelodeon», «Խաղալիք», «Карусель», «O!», «СТС kids», «Հայ TV», «TNT music», «Մուզզոն», «Музыка первого», «Шансон ТВ», «СТС», «TNT», «TNT 4», «Перец», «Рен

ТВ», «ТВ 3», «Пятница», «НТВ сериал», «Бобер», «Время», «TLC», «Авто плюс», «Кухня», «Թավա TV», «8-ий канал», «Bridge русский хит»:

Հանձնաժողովի ծրագրերի մոնիտորինգի և վերահսկողության վարչության կողմից իրականացվել է նաև ցանցային օպերատորի գործունեության մշտադիտարկման արդյունքների արձանագրությունում նշված վերահաղորդվող տեսալսողական ծրագրերի և ցանցային օպերատորի կողմից 2024 թվականի մարտի 20-ին Հանձնաժողով ներկայացված վերահաղորդվող տեսալսողական ծրագրերի ցանկի համադրություն, որի արդյունքում պարզվել է հետևյալը.

Ցանցային օպերատորի կողմից ներկայացված վերահաղորդվող տեսալսողական ծրագրերի ցանկում բացի փաստացի վերահաղորդվող ծրագրերից առկա են նաև «5 Կանալ», «Դոմաշնիյ», «Բրիջ ՏՎ Հիթս», «Բրիջ ՏՎ», «Մատչ Պլանետա», «Կինոխիտ», «Լապկի լայվ», «Սուպեր Գեոյի», «Օխոտա ի Ռիբալկա», «Դետսկիյ Միո», «Մուզ ՏՎ», «Զվեզդա HD», «Ֆուդ նետվորք HD» և «Արմնյուզ 24» տեսալսողական ծրագրերը, որոնք արձանագրություն կազմելու պահին չեն վերահաղորդվել, ինչն արգելված չէ օրենքով և չի խախտում այլոց իրավունքները:

Միաժամանակ պարզվել է, որ ցանցային օպերատորի կողմից ներկայացված վերահաղորդվող տեսալսողական ծրագրերի ցանկում առկա չէ «Ивестия» տեսալսողական ծրագիրը, որը փաստացի վերահաղորդվել է արձանագրությունը կազմելու պահին:

Հարկ է նշել նաև, որ ցանցային օպերատորի կողմից ներկայացված վերահաղորդվող տեսալսողական ծրագրերի ցանկում առկա և արձանագրություն կազմելու պահին վերահաղորդվող «Երկիր Մեդիա», «Հ2» և «ABN» տեսալսողական ծրագրերի գործողության ժամկետը ընկերության կողմից ներկայացված ցանկում նշագրված է «Պայմանագրի կնքումը ընթացքի մեջ է», «8 ԿԱՆԱԼ» տեսալսողական ծրագրի գործողության ժամկետը նշագրված է 31.12.22-, իսկ «ԿԻՆՈՄԱՆ», «ԼԱՅՖԿԱՔ», «Հայ ԹԻՎԻ», «ԹԱՎԱ ԹԻՎԻ», «Խաղալիք», «Բազմոց ԹԻՎԻ», «Ֆիթնես ԹԻՎԻ» և «Մուզգոն» տեսալսողական ծրագրերի գործողության ժամկետը նշագրված է 26 Մարտ 2018:

Հանձնաժողովը, ղեկավարվելով «Վարչարարության հիմունքների և վարչական վարույթի մասին» օրենքի 30-րդ հոդվածի 1-ին մասի բ) կետով, 2024 թվականի մայիսի 17-ին ցանցային օպերատորի նկատմամբ հարուցել է վարչական վարույթ՝ հիմք ընդունելով Հանձնաժողովի ծրագրերի մոնիտորինգի և վերահսկողության վարչության կողմից ցանցային օպերատորի գործունեության մշտադիտարկման արդյունքների հիման վրա 2024 թվականի մայիսի 14-ին կազմված մշտադիտարկման իրականացման և արդյունքների վերաբերյալ արձանագրությունը, որն Օրենքի 42-րդ հոդվածի 18-րդ մասի համաձայն հիմք է հանդիսանում վարչական վարույթ հարուցելու համար, իսկ հարուցված վարչական վարույթի շրջանակներում ծառայում է որպես վարչական վարույթի ապացույց:

Հանձնաժողովը հարուցված վարչական վարույթի մասին 2024 թվականի մայիսի 20-ին ծանուցել է ցանցային օպերատորին և հայտնել, որ այս հարցի վերաբերյալ կարող են ներկայացնել իրենց պարզաբանումները և բացատրությունները:

Ցանցային օպերատորը հարուցված վարչական վարույթի ընթացքում 2024 թվականի մայիսի 23-ին գրությամբ Հանձնաժողով է ներկայացրել վերահաղորդվող ծրագրերի թարմացված ցանկը և արձանագրությամբ նշված «Ивестия», «Երկիր Մեդիա», «Հ2», «ABN», «ԿԻՆՈՄԱՆ», «ԼԱՅՖԿԱՔ», «Հայ ԹԻՎԻ», «ԹԱՎԱ ԹԻՎԻ», «Խաղալիք», «Բազմոց ԹԻՎԻ», «Ֆիթնես ԹԻՎԻ» և «Մուզգոն» տեսալսողական ծրագրերի իրավատերերի հետ կնքված պայմանագրերը և համաձայնագրերը:

Ըստ ներկայացված իրավական հիմքերի՝

- «ՀԱՅԿԱԿԱՆ ԵՐԿՐՈՐԴ ՀԵՌՈՒՍՏԱԱԼԻՔ» ՍՊ ընկերության և «ԲԱԳԵՏ» ՍՊ ընկերության միջև 2024 թվականի մարտի 25-ին անժամկետ կնքվել է «Հայկական երկրորդ հեռուստաալիք» տեսալսողական ծրագրի վերահաղորդման թույլտվության վերաբերյալ պայմանագիրը:

- «ՓԻ ԲԻ ՍԻ» ՍՊ ընկերության և «ԲԱԳԵՏ» ՍՊ ընկերության միջև 2018 թվականի մարտի 26-ին և 2022 թվականի ապրիլի 27-ին կնքվել է Համաձայնագիր 01.12.2016թ. վերահեռարձակման իրավունքի տրամադրման պայմանագրում փոփոխություններ կատարելու վերաբերյալ: 2018 թվականի մարտի 26-ին կնքված Համաձայնագրի համաձայն՝ ցանցային օպերատորն իրավունք ունի 2018 թվականի մայիսի 01-ից անժամկետ վերահաղորդել «ԿԻՆՈՄԱՆ», «ՀԱՅՖՀԱՔ», «Հայ ԹԻՎԻ», «ԹԱՎԱ ԹԻՎԻ», «Խաղալիք», «Բազմոց ԹԻՎԻ», «Ֆիթնես ԹԻՎԻ» և «Մուզոն» տեսալսողական ծրագրերը:

«ՀՈՒՍԱԲԵՐ» ՓԲ ընկերության և «ԲԱԳԵՏ» ՍՊ ընկերության միջև 2024 թվականի մայիսի 21-ին անժամկետ կնքվել է «Երկիր Մեդիա» տեսալսողական ծրագրի վերահաղորդման թույլտվության վերաբերյալ պայմանագիրը:

«ԹԻ ՎԻ ԿՈՆՏԵՆՏ ՍԵՐՎԻՍ» ՍՊ ընկերության և «ԲԱԳԵՏ» ՍՊ ընկերության միջև 2024 թվականի հունվարի 01-ին կնքվել է Պայմանագիր N19՝ վերահեռարձակման իրավունքները փոխանցելու վերաբերյալ, համաձայն որի՝ 2024 թվականի հունվարի 01-ից 2024 թվականի դեկտեմբերի 31-ը ներառյալ ցանցային օպերատորն իրավունք ունի, ի թիվս այլնի, վերահաղորդել «ИЗВЕСТИЯ» տեսալսողական ծրագիրը:

Ցանցային օպերատորը ներկայացրել է նաև «8-ий канал» տեսալսողական ծրագրի վերահաղորդման թույլտվության իրավական հիմքերը, համաձայն որի՝ իրավունք ունի 2023 թվականի հունիսի 02-ից մինչև 2025 թվականի հունվարի 01-ը վերահաղորդել «8-ий канал» տեսալսողական ծրագիրը:

«ՓԻ ԲԻ ՍԻ» ՍՊ ընկերությունը 2022 թվականի մարտի 04-ին գրությամբ Հանձնաժողովին տեղեկացրել է, որ 2022 թվականի մարտի 07-ից «ArmNews24» տեսալսողական ծրագիրն անվանափոխվել է «ABN Armenian Business News» տեսալսողական ծրագրի, իսկ 2022 թվականի նոյեմբերի 15-ի գրությամբ հայտնել է, որ 2022 թվականի նոյեմբերի 07-ից «Ֆիլմզոն» տեսալսողական ծրագիրն անվանափոխվել է «ԼայքՀաք» տեսալսողական ծրագրի:

**Հանձնաժողովի հիմնավորումները (պապճառաբանությունը) և եզրահանգումը.**

Այսպիսով, վարչական վարույթի բազմակողմանի, լրիվ և օբյեկտիվ քննության, ձեռք բերված ապացույցների ուսումնասիրության և գնահատման արդյունքում Հանձնաժողովն ամրագրում է հետևյալը.

**Օրենքի 2-րդ հոդվածի 1-ին մասը սահմանում է՝**

«Հայաստանի Հանրապետության տեսալսողական մեդիայի մասին օրենսդրությունը ներառում է Հայաստանի Հանրապետության Սահմանադրությունը, «Տեսալսողական մեդիայի մասին», «Զանգվածային լրատվության մասին», «Էլեկտրոնային հաղորդակցության մասին», «Հեղինակային իրավունքի և հարակից իրավունքների մասին», «Լեզվի մասին», «Գովազդի մասին» օրենքները, Հայաստանի Հանրապետության ընտրական օրենսգրքը, կարգավորող պետական մարմնի իրավական ակտերը, տեսալսողական մեդիայի ոլորտը կարգավորող այլ իրավական ակտեր և Հայաստանի Հանրապետության միջազգային պայմանագրերը»:

Համաձայն **Օրենքի 32-րդ հոդվածի 1-ին մասի 14-րդ կետի՝** Հանձնաժողովն իրականացնում է Հեռարձակողների և օպերատորների գործունեության մշտադիտարկում:

**Օրենքի 42-րդ հոդվածի 1-ին, 3-րդ, 11-րդ և 18-րդ մասերը սահմանում են՝**

«1. Հեռարձակողների գործունեության մշտադիտարկումն իրականացվում է ուղղակի դիտարկման, իսկ օպերատորի դեպքում՝ նաև տեղում դիտարկում իրականացնելու միջոցով: Ուղղակի դիտարկման արդյունքները կարող են համադրվել տեսալսողական հաղորդումների հաշվառման էլեկտրոնային մատյանների տվյալներին:

3. Տեսալսողական մեդիայի մասին օրենսդրության պահանջների խախտման վերաբերյալ տեղեկություններ ունենալու դեպքում օպերատորի գործունեության տեղում դիտարկումն իրականացվում է կարգավորող պետական մարմնի նախագահի հրամանի հիման վրա:

11. Մշտադիտարկման արդյունքների մասին արձանագրությունն ուղղակի դիտարկում իրականացնելու դեպքում ստորագրում է մշտադիտարկում իրականացրած անձը, իսկ օպերատորի մոտ տեղում դիտարկում իրականացնելու դեպքում ստորագրում է կարգավորող պետական մարմնի և օպերատորի ներկայացուցիչը:

18. Մշտադիտարկման արդյունքների վերաբերյալ արձանագրությունը կարող է հիմք հանդիսանալ վարչական վարույթ հարուցելու համար, իսկ հարուցված վարչական վարույթի շրջանակներում ծառայել որպես վարչական վարույթի ապացույց»:

**Օրենքի 49-րդ հոդվածի 1-ին և 5-րդ մասերի սահմանումով**

«1. Հայաստանի Հանրապետության տարածքում և նրա սահմաններից դուրս գործող Հեռարձակողների տեսալսողական ծրագրերը ցանցային օպերատորի լիցենզիա ստացած անձի կողմից կարող են վերահաղորդվել տեսալսողական ծրագրերի դիստրիբյուտորի կամ հեռարձակողի հետ պայմանագրի հիման վրա:

5. Վերահաղորդվող տեսալսողական ծրագրերի յուրաքանչյուր փոփոխության վերաբերյալ ցանցային օպերատորը տեղեկացնում է կարգավորող պետական մարմնին:»:

**Օրենքի 60-րդ հոդվածի 8-րդ մասի համաձայն՝** սույն օրենքն ուժի մեջ մտնելուց հետո ցանցային օպերատորները կարգավորող պետական մարմնին տեղեկություն են ներկայացնում իրենց ցանցում վերահաղորդվող տեսալսողական ծրագրերի մասին:

**«Հեղինակային իրավունքի և հարակից իրավունքների մասին» օրենքի 39-րդ հոդվածի 1-ին մասի համաձայն՝** այլ անձինք ստեղծագործությունը կարող են օգտագործել միայն ստեղծագործության նկատմամբ գույքային իրավունքները կրող անձի (ստեղծագործության հեղինակ կամ այլ անձ, որին այդ իրավունքներն անցել են օրենքով սահմանված կարգով, այսուհետ՝ իրավատեր) թույլտվությամբ՝ հեղինակային պայմանագրի հիման վրա, եթե սույն օրենքով այլ բան նախատեսված չէ:

**Նույն օրենքի 65-րդ հոդվածի 1-ին մասի համաձայն՝** սույն օրենքով պահպանվող ստեղծագործության կամ դրա էական մասի կամ հարակից իրավունքների օբյեկտի ցանկացած օգտագործում անօրինական է, եթե նախապես, մինչև նման օգտագործումը ձեռք չի բերվել հեղինակային իրավունքի կամ հարակից իրավունքների իրավատիրոջ թույլտվությունը:

Հանձնաժողովը՝ որպես տեսալսողական մեդիայի ոլորտը կարգավորող պետական մարմին, Օրենքով վերապահված իր վերահսկողական լիազորություններն իրականացրել է ցանցային օպերատորի գործունեության մշտադիտարկում՝ տեղում դիտարկում իրականացնելու միջոցով և դիտարկման արդյունքում 2024 թվականի մայիսի 14-ին կազմված արձանագրությամբ նշված տեսալսողական ծրագրերի և ցանցային օպերատորի կողմից

Հանձնաժողով ներկայացված վերահաղորդվող տեսալսողական ծրագրերի ցանկի համադրության արդյունքում արձանագրել է, որ ցանցային օպերատորի կողմից փաստացի վերահաղորդվում են մի շարք տեսալսողական ծրագրեր, որոնք բացակայում են վերջինիս կողմից ներկայացված տեսալսողական ծրագրերի ցանկից:

Հանձնաժողովի կողմից ուսումնասիրվել է վարչական վարույթի ընթացքում ցանցային օպերատորի կողմից ներկայացված վերահաղորդվող տեսալսողական ծրագրերի ցանկը, ինչպես նաև բոլոր տեսալսողական ծրագրերի վերահաղորդման վերաբերյալ կնքված պայմանագրերն ու դրանց համաձայնագրերը, և ուսումնասիրությունից պարզ է դարձել, որ ցանցային օպերատորն ունի «Известия», «Երկիր Մեդիա», «Հ2», «ABN», «ԿԻՆՈՄԱՆ», «ԼԱՅՖՀԱԲ», «Հայ ԹՒՎԻ», «ԹԱՎԱ ԹՒՎԻ», «Խաղալիք», «Բազմոց ԹՒՎԻ», «Ֆիթնես ԹՒՎԻ» և «Մուզոն» տեսալսողական ծրագրերի վերահաղորդման իրավական հիմքերը:

Վերոգրյալից պարզ է դառնում, որ ցանցային օպերատորը չի խախտել Օրենքի դրույթները, և տեսալսողական ծրագրերը վերահաղորդվել են համապատասխան պայմանագրերի և դրանց ժամկետների երկարաձգման համաձայնագրերի հիման վրա:

Փաստենք նաև, որ ցանցային օպերատորը 2020 թվականի ապրիլի 22-ից հանդիսանում է Հանձնաժողովի կողմից լիցենզավորված իրավաբանական անձ (սփռման տարածքը՝ Կոտայքի մարզ):

Այսպիսով, հաշվի առնելով այն փաստը, որ ցանցային օպերատորը տեսալսողական ծրագրերը վերահաղորդել է համապատասխան իրավունքը հավաստող փաստաթղթերի՝ պայմանագրերի և դրանց համաձայնագրերի առկայությամբ, ուստի վարչական վարույթի բազմակողմանի, լրիվ և օբյեկտիվ քննությամբ, ձեռք բերված ապացույցների ուսումնասիրության և գնահատման արդյունքում Հանձնաժողովն արձանագրում է, որ վարչական իրավախախտման դեպքի կամ կազմի բացակայության հիմքով ցանցային օպերատորի նկատմամբ հարուցված թիվ 29 վարչական վարույթը ենթակա է կարճման:

«Վարչական իրավախախտումների վերաբերյալ» օրենսգրքի 247-րդ հոդվածի 1-ին կետով սահմանված է՝ վարչական իրավախախտման վերաբերյալ գործի վարույթը չի կարող սկսվել, իսկ սկսվածը ենթակա է կարճման հետևյալ հանգամանքների առկայության դեպքում՝

**1) վարչական իրավախախտման դեպքի կամ կազմի բացակայությունը:**

«Վարչական իրավախախտումների վերաբերյալ» օրենսգրքի 282-րդ հոդվածի համաձայն՝ քննելով վարչական իրավախախտման վերաբերյալ գործը, մարմինը (պաշտոնատար անձը) ընդունում է հետևյալ որոշումներից մեկը՝

1) վարչական տույժ նշանակելու մասին.

**2) գործի վարույթը կարճելու մասին:**

Գործի վարույթը կարճելու մասին որոշում ընդունվում է բանավոր դիտողություն հայտարարելու, նյութերը ընկերական դատարանի, ձեռնարկությունում, հիմնարկում, կազմակերպությունում և դրանց կառուցվածքային ստորաբաժանումներում ստեղծված՝ հարբեցողության դեմ պայքարի հանձնաժողովի, հասարակական կազմակերպության կամ աշխատավորական կոլեկտիվի քննությանը հանձնելու կամ դատախազին, նախաքննության կամ հետաքննության մարմնին հանձնելու դեպքում, ինչպես նաև սույն օրենսգրքի 247 հոդվածով նախատեսված հանգամանքների առկայության դեպքում:

Ելնելով վերոգրյալից և ղեկավարվելով «Տեսալսողական մեդիայի մասին» օրենքի 2-րդ հոդվածի 1-ին մասով, 32-րդ հոդվածի 1-ին մասի 11-րդ և 14-րդ կետերով, 42-րդ հոդվածով, 49-րդ հոդվածի 1-ին և 5-րդ մասերով և հիմք ընդունելով «Վարչական իրավախախտումների

վերաբերյալ» ՀՀ օրենսգրքի 247-րդ հոդվածի 1-ին կետի, 282-րդ հոդվածի դրույթները՝  
Հեռուստատեսության և ռադիոյի հանձնաժողովը **որոշեց՝**

1. «ԲԱԳԵՏ» ՍՊ ընկերության նկատմամբ հարուցված թիվ 29 վարչական վարույթը կարճել:

2. Սույն որոշումն ուժի մեջ է մտնում այն «ԲԱԳԵՏ» ՍՊ ընկերությանը պատշաճ ձևով հանձնելու օրվան հաջորդող օրվանից:

3. Սույն որոշումը կարող է բողոքարկվել ՀՀ վարչական դատարան՝ ուժի մեջ մտնելու օրվանից երկամսյա ժամկետում:

**ՀԵՌՈՒՍՏԱՏԵՍՈՒԹՅԱՆ ԵՎ ՌԱԴԻՈՅԻ  
ՀԱՆՁՆԱԺՈՂՈՎԻ ՆԱԽԱԳԱՀԻ  
ՊԱՇՏՈՆԱԿԱՏԱՐ**

**Գ. ՄԱՄԻԿՈՆՅԱՆ**

2024թ. հունիսի 07  
ք. Երևան